

## **Kapitulo 9**

### **E konflikto ku lo baha Hesus for di shelu**

Hende no sa ku tin dos dies mandamentu. I ta lògiko e ora ei ku nan no sa ku ta ku e pleitu entre e dos dies mandamentunan, Hesus ta bini i ta fin di e mundu. (Revelashon 14:6,7) Evangelio eterno ta pa sera nos konosi ku Dios Su lei promé ku e huisio bini. Ta ku e dies mandamentunan Dios ta bai husga e mundu. (Revelashon 11:17-19) Revelashon 14:9-11 ta bisa nos ku tin sentensia pa tur esnan ku adorá e bestia. Esnan di versikulo 12 ta skapa, paso nan ta warda e mandamentunan di Dios i tin fe den Hesus.

E dos dies mandamentunan, kada unu ta kontené un dia di adorashon diferente. Dios a bendishoná i santifiká e di 7 dia di siman i a yam'é Sabat di Señor bo Dios. E otro dies mandamentu a pone e promé dia di siman pa adorashon. Dios ta duna nos e rason di adorashon. Pasobra den seis dia Dios a traha shelunan i tera, laman i tur loke tin den nan, i a sosegá riba e di shete dia; pesei Dios a bendishoná dia di Sabat a i santifiká e di shete dia pa adorashon. (Revelashon 14:6,7 i Eksodo 20:8)

Dios a pone e Sabat komo señal entre Dios i Su pueblo. (Ezekiel 20:20) Hesus ta pone e Sabat komo señal di Hesus i Su disipelnan. Kuminsando ku Mateo 24:3, Hesus Su disipelnan ta bai apart serka dj'E i ta pidi pa señalnan di Su binida i di fin di mundu.

Na versikulo 4 i 5, Hesus ta muestra su mayor preokupashon, kual ta e mintirosonan, ku lo kohe e malu ku diabel a hasi di kambia e lei di Dios, i bisa ku ta Hesus mes a hasié. Ripara ku Hesus a sigui duna señal henter e kapitulo 24 aki i na versikulo 20 BS, E ta bisa: "Ma hasi orashon pa boso huida no sosodé den wènter, ni riba un dia di Sabat."

Versikulo 21 BS: "Pasobra e ora ei lo tin un gran tribulashon, manera nunca tabatin for di prinsipio di mundu te awor aki, i ku lo no tin nunca mas tampoko." Tin hopi hende ku ta relashoná e versikulonan 20 i 21 aki ku e destrukshon di Herúsalem.

E tribulashon di e destrukshon di Herúsalem ta chikitu kompará ku awor aki ku diabel ta bai lanta henter mundu, tur gobièrnu i iglesianan ku ta sigui e dies mandamentunan falsu, pa fòrsá e poko hendenan ku ta warda e mandamentunan di Dios, pa nan tambe bai warda e dies mandamentunan falsu.

Gobièrnu lo manda sera e portanan di e iglesia ku ta adorá riba Sabat, i to surgi un aflikshon asina grandi ku Hesus lo baha for di shelu pa libra Su pueblo. (Versikulo 30 i 31.) Mateo 24:20-30 ta muestra nos ku ta den e pèrsiguishon aki Hesus ta bini. Si esaki no ta suficiente, Daniel 12:1,2 BS ta kompletá bisando: "Awor e tempu ei, Miguel, e gran Prens ku ta protehá e yu hòmbènan di bo pueblo, lo lanta. I lo tin un tempu di angustia manera nunca tabatin for di tempu ku

tabata eksisti un nashon te na e tempu ei: i e tempu ei bo pueblo, tur hende ku su nòmber wòrdu hañá skirbi den e buki, lo wòrdu reskatá. I hopi di esnan ku ta drumi den stòf di suela lo spièrta, algun pa bida etèrno, ma otronan pa bèrgwensa i despresio etèrno."

"Anto señal di Yu di hende lo parse den shelu, i anto tur generashon di mundu lo yora, i lo mira e Yu di hende bini riba nubianan di shelu ku poder grandi i gloria." Mateo 24:30 Tur versikulo ku ta papia di binida di Hesus ta bisa ku tur generashon lo yora. Dikon? Hende mester stima e binida di Hesus i resa pidi pa Hesus bini. Si un hende no ta stima e binida di Hesus, e hende aki lo yora.

Otro punto. Ora ku Hesus bini, e mundu lo ta parti den dos, esnan ku ta respetá Dios Su santu lei, i e masa grandi ku ta kontra e lei di Dios. Lo tin un grupito ku ta warda e Sabat di Señor, tanten ku e mundu lo sigui ku e lei di djadumingu. Esaki lo trese kuné ku nan lo pèrsigui esnan ku ta warda e Sabat. Anto e Señor di Sabat lo baha di shelu, anto tur lo yora. (Markos 2:28) "Pasobra ku kandela i ku Su spada Señor lo ehekutá huisio riba tur karni, i esnan ku Señor mata lo ta hopi." Isaias 66:16 BS

Hesus a bai shelu Señor di Sabat i Hesus lo bini bek Señor di Sabat. Hesus no ta kambia nunca. "Esnan ku ta santifiká i ta purifiká nan mes pa bai den e hòfinan, siguiendo tras di esun meimei, kendenan ta kome karni porko, kos repugnante i raton, nan tur huntu lo yega na un fin, Señor ta deklará." Isaias 66:17 BS Si Señor bini awor aki i mata tur esnan ku ta kome porko i tur e otro kosnan ku Dios a prohibí, ken ta keda bibu? Esnan ku ta keda bibu ta esnan ku ta obedesé Dios den komementu tambe.

Isaias 66:22-24 BS ta bisa: "Pasobra meskos ku e shelunan nobo i e tera nobo, ku lo Mi traha, lo permanesé Mi dilanti," Señor ta deklará, "asina boso desendientenan i boso nòmber lo permanesé. I lo ta di luna nobo pa luna nobo, i di sabat pa sabat, ku henter humanidat lo bin pa bùig Mi ditanti" Señor ta bisa. "Anto nan lo sali mira e kadavernan di e hòmbenan ku a transgresá kontra Mi; pasobra nan bichi lo no muri, i nan kandela lo no wòrdu pagá, i nan lo ta un abominashon pa henter humanidat." Esaki ta fin di Revelashon 17:5.

Awe Dios tin un iglesia ku ta siña henter humanidat pa no kome karni di porko i tambe e otro kosnan ku Dios a prohibí pa kome, i pa warda e Sabat di Señor. Dios a primintí ku e iglesia ei lo keda den shelu i tera nobo pa eternidat. Por tin mas kla ku esaki? Buska e iglesia aki i duna gloria na Dios, ador'E i biba. (Revelashon 14:6,7,12)

Diabel, astuto manera e ta, a kambia e lei di Dios di un manera ku hende no ta haña problema ku otro, pero hende lo ta den problema ku Dios. Diabel a kambia e dos mandamentunan di mas grandi den e lei, ku ta nos relashon ku Dios. No ta pòrnada ku Dios a skirbi asina largu na mandamentunan dos i kuater. Diabel a kita mandamentu dos kompletu, paso esaki ta bisa ku ta esnan ku stima Dios i

warda Su mandamentunan ta haña misericórdia. P'esei diabel a kit'é, pa hende no mira ku dor di obediensia na e lei **miserikòrdia i óf grasia** ta bini.

Komprondé ku ta tur loke Dios a hasi pa salba hende, diabel ta falsifiká pa gaña hende pa nan bai pérdi. Esnan ku ta sabí ta tene na loke Dios a pone. E bobedat di mas grandi ku hende por hasi, ta pretendé di uni e Beibel ku un dies mandamentu ku no ta den Beibel.

Esaki ta e abominashon di Revelashon 17:5. Isaias a bisa bon kla ku e palabra ku a sali di Herúsalem ta bai pa tur nashon ku e lei ku a sali di Sion.

Mundu ta pretendé ku mester pone e dies mandamentu ku ta skirbi den Beibel un banda, pa uni e Beibel ku un dies mandamentu ku a wòrdu skirbi masoméno 538 aña despues di Hesus i ku a sosodé kaminda diabel ta sintá riba mundu. No tin nada mas abominabel ku esaki. I e abominábelnan, nan fin ta doloroso. (Isaias 66:22-24; Isaias 24:5,6; Revelashon 14:9-11)

Señor lo kaba ku e rebeldenan. E Santunan ku ta warda e mandamentunan di Dios i tin fe den Hesus, lo haña nan rekompensa. Revelashon 14:12

## *De Tien Geboden van God*

---



1. Gij zult geen afgoden vereren maar Mij alleen aanbidden en, boven alles beminnen.
2. Gij zult de Naam van de Heer uw God, niet zonder eerbied gebruiken.
3. Wees gedachtig dat gij de dag des Heren heiligt.
  4. Eer uw vader en uw moeder.
  5. Gij zult niet doden.
6. Gij zult geen onkuisheid doen.
  7. Gij zult niet stelen.
8. Gij zult tegen uw naaste niet vals getuigen.
9. Gij zult geen onkuisheid begeren.
10. Gij zult niet onrechtvaardig begeren wat uw naaste toebehoort.

### *Dies Mandamentunan di Dios*

01. Adorá Dios so i stim'E mas ku tur kos.
02. No usa Nòmber di Dios sin mester.
  03. Santifiká dia di Señor.
  04. Honra bo tata i bo mama.
  05. No mata.
  06. No hasi kos deshonesto.
  07. No hòrta.
08. No lanta falsu testimonio riba bo próhimo.
  09. No deseá kos deshonesto.
  10. No kudishá kos di otro hende.

## E LEI DI DIOS - EKSODO 20:2-27

- I. Ami ta Señor bo Dios, lo bo no tin otro diosnan Mi dilanti.
- II. Lo bo no traha pa bo mes ningun imágen graba di kosnan ku tin ariba na shelu ni abou na tera, ni di kosnan ku tin den awanan bou di tera lo bo no baha bo mes dilanti nan ni sirbi nan; pasombra Ami bo Dios ta un Dios fuerte, yalurs, ku ta bishita inhustisia di tatanan riba yunan, te na di tres i kuater generashon di esnan ku ta aborese Mi; i ta muestra misericórdia na miles di esnan ku ta stima Mi i ta warda Mi mandamentunan.
- III. Lo bo no tuma nòmber di Señor bo Dios enbano; pasombra Dios lo no tuma pa inosente esnan ku ta tuma Su nòmber pòrnada.
- IV. Rekordá e dia di Sabat pa bo tene santu, seis dia lo bo traha i hasi tur bo trabou; ma e dia di shete ta Sabat di Señor bo Dios, riba dje lo bo no hasi ningun trabou. Abo ni bo yu hòmer, ni bo yu muhé, ni bo kriá, ni bo sirbidó, no bo bestia, ni e stranhero ku ta den bo porta. Pasombra den seis dia Dios a krea shelu i tera, laman i tur kos ku ta den nan, i E la sosegá e di shete; p'esei E la bendishoná e dia di Sabat i a santifik'é.
- V. Honra bo tata i bo mama; pa bo dianan por ta largu riba e tera ku Señor bo Dios a duna bo.
- VI. Lo bo no mata.
- VII. Lo bo no kometé adulterio.
- VIII. Lo bo no hòrta.
- IX. Lo bo no lanta falsu testimonio kontra bo próhimo
- X. Lo bo no kudishá kas di bo bisiña; ni su muhé, ni su kriá, ni su baka, ni su buriku, ni nada ku ta pertenesé na bo bisiña.

## Dios Su amor pa nos

Dios a prueba Su amor na nos, Juan 3:16. Kiko ta prueba nos amor na Dios? (Juan 14:15.) Dios a uza hende pa skirbi Beibel i tur hende ta aseptá e Beibel komo palabra di Dios i nos tur ku ta kere den Dios ta respetá e Beibel komo palabra di Dios.

Dios ta aploudi tur ku tin rèspèt pa Su palabra e Beibel. (Deuteronomio 10:3,4, Eksodo 20:2-7) Pero den e Beibel tan respetá ei tin un parti ku Dios mes a skirbi, uniko skritura ku Dios mes a skirbi ta e dies mandamentu. Si e partinan ku hendenan inspirá pa Dios a skirbi ta digno di rèspèt, kuantu mas e parti ku Dios mes a skirbi?

Algun hende ta separá e lei for di e amor di Dios, e lei ta puru amor, e ta amor pa Dios i pa bo pròhimo. Dios a prueba Su amor na nos dor di duna nos Su yu Hesus, Juan 3:16. Prueba di nos amor na Dios ta Su santu lei (Juan 14:15, Eksodo 20:5,6).

Awor tin dos manera di kibra lei; un ta pordonabel e otro no ta pordonabel. (Mateo 5:17-19, Proverbionan 28:9, Isaias 24:1-6) Esnan ku ta stima Dios i ta deseá di warda Su mandamentunan i pa debilidat e la falta ku e lei si e pidi pordon e ta haña pordon, pero esun ku siña pa kibra e mandamentunan e no ta pidi pordon nunca. (Santiago 2:10-11) Pago di esnan ku ta stima Señor. (1 Korintionan 2:9, Revelashon 14:12)

Awor nos sa ku tin dos dies mandamentu e berdadero i e falsu. Ta kua Dios ta pidi nos warda pa amor Pe? Abo ku ta stima Dios proba esei wardando Su santu lei.

Ku Dios bendishoná bo.